

**Pool gbouŋ nba pukiŋ ŋanlee
ki u din sɔb ki tur
TIMOTI
nae na**

Ki jiin 2 Timoti gbouŋ na po

Pool gbouŋ nba pukiŋ ŋanlee ki u din sɔb ki tur Timoti na din mantik tee kpaaniie ki teenɔ, ki u tee u toontunnanlɔɔ nba tee bik, ki bia tee u sommtɔɔ. Li baryur jiin gbankur poe. U teen Timoti kpaanii nan kpaŋ-n-mɔŋ a wuu mɔontir Masia po, kii dia barmɔnii wannu nba tee barganii na, nan Yennu gbounkperuk ni maan na, ki bia tun u toonn nan waa set tee wantɔɔ nan barganii mɔont-tɔɔ na, kii di biak.

¹ Min Pool, wunba teen Yiisa Masia toonii, Yennu loomm paak, a n mɔont manfoor nba ki Yennu din lor turit Yiisa Masia paak na, ² n sɔbin gbouŋ na ki teen n bilonkak Timoti. Ti Baa Yennu nan ti Yomdaano Yiisa Masia lomm nan ninbatinu nan parmaasir-ii be nana.

Ki jiin niipoturu nan kpaanii po

³ Yennu nba ki n jiantiro nan dudukŋant, nan n yeejamm nba din tuun bianŋinba na, mi-i meio, n tian a po yoo kura n miaru maŋ ni, nyioɔk nan yonnu ni, ki teeno niipoouk a paak.

⁴ N tian a ninnyuut po, ki lek loon ki n la-a kii mɔk parpeenn bonchiann. ⁵ N tian faa teen Yiisa Masia yada nan barmɔnii bianŋinba; ki a yaa Lowis nan a naa Yunis mun poŋ din teeno yadawa. N ki mɔk birsuk, a mun bia teeno

yadawa. ⁶ Li paak ki n tiana maa fan fiin piinii nba ki Yennu tura yoo nba ki n din yii n nii a paak na, ⁷ kimaan Seyeen nba ki Yennu turit na ki teenit jaŋmaandamm kaa, ŋaan Seyeen maŋ teent paŋ nan lomm, nan dia-n-moŋ binbeŋe.

⁸ Li paak, ii moontir ti Yomdaano labaar na ki daa tiin fei. A bia daa tiin fei nan maa be dansarik ni u paak na, ŋaan sak biakdinu u barŋanii maŋ paak, nan Yennu nba tura paŋ biaŋinba na. ⁹ Ŋoo Yennu-e tinnit ki yiinit a tii tee popeendamm. Waa yiinit biaŋinba, li ki tee ti toonŋana paak kaa, ŋaan u moŋe din senn a u saa tint ninbaauk, Yiisa Masia paak. U din senn nnae yoo nba ki u daa ki nan durinya na. ¹⁰ Ŋaan ti Tinntoo Yiisa Masia-e baar ki fiit wannit li po. Ŋoo Yiisa Masia din biir kuun paŋ, ŋaan bia wannit a ti-i sak u barŋanii maŋ, ti saa la manfoor nba kaa gbennu.

¹¹ Yennu poŋ din yiinin a n teen toonii nan wantoo ki moont barŋanii maŋe. ¹² Li paake ki n di biak ŋaan ki tiin fei, kimaan n mi maa jii n moŋ ki teen wunba nuu ni, n mi ki birsuk kaa nan u saa fit dia linba ki u jii teen n nuu ni na fanu moŋmoŋ nan joontu Daar na ni. ¹³ Ii dia maa din wanna barŋanii soŋu nba na fanu, kii waa-r nan yada nan lomm nba ki Yiisa Masia teent na. ¹⁴ Yennu Seyeen paŋ nba be ti ni na paak, ii dia barŋanii nba ki u jii teen a nuu ni na.

¹⁵ A poŋ mi nan soo kur nba be Asia yent ni na nyikima; bi siabe tee Fijelus nan Hemojenes. ¹⁶ Ti Yomdaano n tin Onesiforus ŋaateeb ninbaauk, kimaan u daan yoo cheen

n par, ki ki tin fei nan maa be dansarik ni na. ¹⁷Waa daan tan baar Rom doo ni yoo nba, ki u piin loon maa be siaminba nan waa tan la n boor. ¹⁸Ti Yomdaano n tino ninbaauk joontu Daar maŋ ni. A moŋ mi fanu waa din sommin bonchiann bianinba, Efesus doo ni.

2

Ki jiin Yiisa Masia lanjinŋano po

¹ N bik, fin ŋanimin chee a par Yiisa Masia nba somma bianinba, u ninbatinu ni na paak.

² Faa poŋ din gbat wannu nba n peŋ, niib bonchiann numm ni na, a jiir ki wann nisiab nba tee yadadam, binba saa fit wann leeb mun.

³ A sak di biak nanin, faa tee Yiisa Masia lanjinŋano na. ⁴ Lanjima nba loon u saako numm n gboou, u ji ki ŋmat u binbeŋ nan linba ki tee lanjimanba toona. ⁵ Wunba tiin poot nantaar kan fit nyann ki gaar li nyoot, see ki u sak wei li sennu kur. ⁶ Li kpaas talas ki kpaaro nba tun nan ninmonn n sint gaar jeet na tor.

⁷ Ii dukii linba ki n beera na po, kimaan ti Yomdaano saa te ki fan fit bann li kura paak.

⁸ Ii tian Yiisa Masia po, wunba tee Defid yaaboonn, ki din fiir kuun ni, nan maa moontir barŋanii na ki teen niib bianinba na. ⁹ Barŋanii maŋ paak, ki n be nan jarit ki di biak, nan n tee toonbiitdaano na; Yennu barii maŋ ŋarin ki be nan jarit kaa. ¹⁰ Ŋaan Yennu nigannkab na paak ki n lek di sukuru biak kur ni, a bin mun la tinnu Yiisa Masia paak, kii mok parpeenn nba kaa gbennu na. ¹¹ Barii na tee mamomme a:

“Ti-i kpo nano,
ti mun tan sii mək manfoor nanœ.

¹² Ti-i ŋammit yabii, ti mun tan saa di naan
nanœ;
ŋaan ti-i yaa ti ki miu, u mun tan sii yaa u ki
miti.

¹³ Ti-i kii mək yada, ŋaan ŋoo tee barmonii
daanœ,
kimaan u kan mi noi u mɔŋ binbenji.”

Ki jiin toontunno nba pent Yennu par po

¹⁴ A tiar a niib linba na, ki turib kpaanii
Yennu boor, a bi daa kɔn mɔbona paaki; ŋann
ki mək nyoot, ŋaan li biir binba gbiin nae.

¹⁵ Yabit a mɔŋ paak ki Yennu n paka, kii tee
toontunno nba dia barmonii mɔmaan ki want
niib fanu, ki tan daa di fei u toona ni. ¹⁶ A
nyinn a mɔŋ labafaanu nba ki tee Yennu yar
ki bia ki mək nyoot, ki saa te ki niib n fɔkit nan
Yennu na ni. ¹⁷ Li wann-booru tee nan fiok nba
tuu di gbanant nae. Haimeneus nan Filetus
daan want li wann boorue. ¹⁸ Bi ki want niib
barmonii labaar, ŋaan tuni siab yada ki yaa
kuun fiiru yoo na poŋ baar gara; ¹⁹ ŋaan Yennu
mɔmaan na ŋarin see-e chib nan fiakir nba kan
mi damm na; ki mɔbona nba sob li paak tee
nnae a: “Ti Yomdaano mi binba tee u yab.” Li
bia sob a, “Wunba kur yet a u tee ti Yomdaano
yooe, li kpaas talas ki wun nyik toonbiit tumu.”

²⁰ Ŋmanbooru boorue be ŋasaakak ni; kut-
sont kuukoo kaa be li ni, siab tee ŋmanii,
ki siab mun tee yok. Ki li siab nyoot yab
bonchiann, ki siab nyoot ki yabi. ²¹ Wunba-
i nyik toonbiit ki tee popeendaano, u sii tee
nan ŋmaŋ nba mək nyoot ti Yomdaano boor,

ki jaŋ nano, ki teen siir a wun tun toonŋana kura nae. ²² Nyint a moŋ nipaauŋ nianbiuk na ni, ŋaan kot ki fin nan binba para yeen ki bi yi ti Yomdaano ki loon sommir na n wei yentinu sɔnu, nan yada sɔnu, nan lomm sɔnu, nan parmaasir sɔnu. ²³ A nyik jatii nan liinsin moniat. A poŋ mi nan li joontir nan kunkɔnae. ²⁴ Li ki ŋan ki ti Yomdaano toontunno-ii kɔn nan niibi. Li ŋan ki wuu tee burchimɔe sɔɔ kur boor, kii tee wantoŋano nba mɔk sukuru, ²⁵ kii tee wunba be soon nna kii kpaan binba noi nano na, li pasiar Yennu n tan turib yaak ki bin nyik bi dudukbiit maŋ ki bann barmonii wannu, ²⁶ ki la yan ki lokit Sintaanii barit, ki sak ŋɔɔ Yennu loomm.

3

Ki jiin dajoontii po

¹ Ii mi nan tingbouŋ na dajoontii yoo tan sii paar. ² Niib tan sii tee jawudamme, nan liklonbiiuk damm, nan karinbaandamm, nan want-n-moŋ damm, nan binba sukii niib, nan binba ki saak bi damm moi, nan binba ki tian ŋamm po, nan binba ki tiin Yennu. ³ Bi tan kii mɔk lomm nan niibi. Bi tan sii tee molanfikdamme, ki kan soor bi moŋi, ki sii tee kpikpiruk damm; ki naan bonsusoot; bi tan kii loon toonŋanae, ⁴ bi tan sii nyi leeb poae, ki tee kaatkaat damm, ki dont bi moŋ; bi tan sii loon linba mamme ki gar Yennu, ⁵ bi tan sii dia Yenjiantu sanne, ŋaan ki saak Yennu paŋ. Nyint a moŋ li nibooru ni. ⁶ Bi siabe lin ki doi ŋei ki kpann ki nyant pooliinii nba

tuun toonbiit bonchiann ki waa bi para nianbiit booru booru na. ⁷ Yoo kura, li poob tumiie ɲaan kan mi bann barmɔnii sɔnu. ⁸ Janes nan Jamberes nba din ki sak nan Moses biaɲinba na, li jabooru mun tee nnae, bi kɔn nan barmɔniie, bi dudukit ki ɲani, bi bia ki waa yada sɔnu; ⁹ ɲaan bi kan fit kpann niib ki yukiri, kimaan sɔɔ kur tan saa la bi jatii nba tee biaɲinba, nan baa din la Janes nan Jamberes jatii biaɲinba na.

Kpaanjoontii

¹⁰ Ɔaan fin ɲarin poɲ wei n wannu, nan n binbeɲ, nan n dudukita. A poɲ mi maa teen Masia yada biaɲinba, nan n sukuru, nan n lomm nan niib, nan n gbankur, ¹¹ nan niib nba mukisin biaɲinba, nan n biakdinu ni. A mi linba kur tumin Antiok, nan Ikonium nan Listra doi ni. A mi maa din la mukisubiit biaɲinba; ɲaan ti Yomdaance nyinnin li kur ni. ¹² Barmɔniie, niib saa mukis wunba kur tee Yiisa Masia yɔɔ ki loon wuu tee yentinnɔ na; ¹³ ki nibiit nan kpinkpannii damm lek tan sii ɲammit pukii bi toonbiit, ki kpann leeb, ki bi leeb mun saa kpannib. ¹⁴ Ɔaan fin ɲarin, ii dia barii nba ki a tumii ki teenir yada na, kimaan a poɲ mi nan binba din tee a wantteeb na tee barmɔnii damme; ¹⁵ ki a bisin niwa, a poɲ mi Yennu gbouɲ nba fit teena yan, ki wanta faa saa teen Yiisa Masia yada ki tinn biaɲinba. ¹⁶ Maan nba kur be Yennu gbouɲ ni na nyii u mob nie, ki li kur mɔk nyɔɔte, ki wantit u po, ki kpaanit, ki ɲammit ti benu, ki wantit yentinu

sonu, ¹⁷ a Yennu toontunno binben-ii ḡan, ki wun teen siir kii tuun toonḡanbooru kur.

4

¹ Yiisa Masia nba tan saa jen ki di naan ki bu footib nan kpeemm buut na, ḡoo nan Yennu toonne ki n beera, ² a fii moontir u barii; ki yoo-i lekii jaḡ koo li-i kii jaḡi, fin-ii moontir, kii piak niib bi toonbiit po, kii kpaanib, kii koontib para, kii wantib barii maḡ nan sukuru yoo kura, ³ kimaan yoo baat ki niib ji tan kii gbiin wannḡanu, ḡaan tan sii waa bi moḡ nianbiite, ki gbiin wantteeb bonchiann nba sii wantib baa loon bii gbia linba. ⁴ Bi kan gbiint barmonii maḡi, ḡaan loon bii gbiin labagana. ⁵ ḡaan fin-ii tee subindaano yoo kur, kii saak biakdinu, kii moontir Yiisa Masia barḡanii, kii tuun toona kur nba ki Yennu tura na.

⁶ Kimaan min ḡarin, yoo baar nan man lu n miara; yoo baar nan man nyi tingbouḡ na niwa. ⁷ N gbaa gbigbaaḡanna; ki tun n toonn gbenna; n lek dia yada labaar na. ⁸ Li paak, nyoot nba tee yentinu nyoot doo guun sanpaapo; ki ti Yomdaano, wunba bu niib buut nan barmonii na tan saa turin nyoot maḡ, buut daar. U tan kan tur min kuukoḡ kaa, ḡaan u tan saa tur binba kur mun loon wun jen nae.

Majoontik

⁹ Yabit ki baar n peḡ yian yian na. Kreskens saan Galasia-wa, ki Taitus mun saan Dalmasia-wa, ¹⁰ Demas mantik loon tingbouḡ na bona bonchiann, li paak u nyikin ki mun saan Tesalonika-wa. ¹¹ Luk kuukoḡe ji be nanin. Jiin

Mak baar nano na, kimaan u toona mok nyoot ki turin bonchiann. ¹² N tun Tikikus ki u saan Efesus-a. ¹³ Fi-i baat yoo nba, fan jii n liatir nba ki n daan nyik Trowas, ki li be Kapus boor na; a bia jii n gbanpɔɔbir nan n kadagbant na.

¹⁴ Aleksander, wunba kur sauk na din tumin linba bi bonchiann; Yennu saa dat u tubir, waa tun linba na paak. ¹⁵ Ii mi a mɔɔj nano, kimaan u kɔn nant, barɔɔnii nba ki ti mɔontir na paak bonchiann.

¹⁶ Maa daan piin n mɔɔj paak kɔnn na, sɔɔ ki set n poorpo; bi kur daan nyikimi. Yennu daa teemm biit li paaki. ¹⁷ Ŋaan ti Yomdaano daan be nanin, ki turin paɔ, ki n fit mɔn barɔɔnii maɔ kur ki tur binba ki tee Juu teeb na kura, a bin gbat. Ŋɔɔe daan nyinnin kuun ni. ¹⁸ Ŋɔɔe bia saa nyinnin bonbiir kur ni, ki kɔnnin u naan nba be sanpaapo na ni nan laafia. Ŋɔɔe yen dontir mokmok nan mokmok. Mamɔmm.

Foontjoontii

¹⁹ N jikit n foontii ki teen Prisila nan Akuila, nan Onesiforus ɔaateeb. ²⁰ Erastus daan biar Korint-a. Trofimus daan kaa laafia, ki n nyiko Miletus. ²¹ Yabit ki baar nnawa ki tinkook n do. Yubulus nan Pudens nan Linus nan Klodia teena bi foontii; ki Masiaweira kura bia foonta. ²² Ti Yomdaano-ii be nana. Yennu ninkpabaun-ii be nani.

Yennu Gbouŋ Mɔɔr
Bimoba: Yennu Gbouŋ Mɔɔr Bible

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Sep 2022 from source
files dated 11 Jul 2022

00d89ba0-4677-52d9-9bc5-aa3d7c5c966d